



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sutkinja Sanela Gorušanović - Butigan i sudija Velimir Ninković, potpredsjednici Vijeća, te sudija Aleksandra Obradović, tužiteljica Bojana Jolović, tužiteljica Snježana Petković, sudija Izo Tankić, sudija Sedin Idrizović, prof. dr. Džamna Vranić, dr. sc. Davor Martinović, tužiteljica Željka Fabić, advokatica Elma Veleđar Arifagić i advokatica mr. Duška Bogojević, na sjednici održanoj 18. i 19.06.2025. godine, donijelo je

RJEŠENJE **o imenovanju sudije Kantonalnog suda u Bihaću**

- I. Za sudiju Kantonalnog suda u Bihaću imenuje se **Abdić Adis**.
- II. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija sudije Kantonalnog suda u Bihaću, sa iskustvom na građanskom referatu.

Navedena sudijska pozicija je ponovljena odlukom Vijeća koja je donesena na sjednici održanoj 04.06.2024. godine. Odluka o ponavljanju konkursa za 1 (jednu) poziciju sudije navedenog suda, koja je bila oglašena konkursom, broj: 04-07-3-188-1/2024 od 15.01.2024. godine, donesena je iz razloga što niko od prijavljenih kandidata nije ostvario odgovarajući uspjeh u konkursnoj proceduri.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4) Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za poziciju sudije Kantonalnog suda u Bihaću imenuje kandidata na rang listi pod rednim brojem 1 Abdić Adisa iz reda bošnjačkog naroda, koji od 01.08.2011. godine obavlja dužnost sudije Općinskog suda u Bosanskoj Krupi. Imenovani kandidat sudijsku dužnost trenutno obavlja na krivičnom, građanskom, prekršajnom i izvršnom referatu.

Prethodno imenovanju na poziciju sudije Općinskog suda u Bosanskoj Krupi, imenovani kandidat je svoju profesionalnu karijeru gradio u organima uprave Općine Bužim, obavljajući poslove općinskog pravobranioca, stručnog savjetnika za imovinsko - pravne poslove, stručnog saradnika za imovinsko - pravne poslove i pripravnika u Službi za prostorno uređenje, geodetske i imovinsko - pravne poslove.

Vijeće je nakon ocjene stručne sposobnosti kandidata zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Prilikom imenovanja navedenog kandidata, Vijeće je u skladu sa članom 59b. stavak (5) tač. a), b), c) i d), a u vezi sa članom 61. Poslovnika VSTV-a BiH, kumulativno vodilo računa o broju ostvarenih bodova kandidata, okolnostima koje su relevantne za procjenu podobnosti kandidata iz člana 48a. ovog poslovnika, potrebi osiguranja adekvatne nacionalne i spolne zastupljenosti u sudu, odnosno tužilaštvu, u smislu člana 43. stav (2) Zakona i radnom iskustvu kandidata u određenoj oblasti prava obzirom da je u odnosu na sud u kojem se vrši imenovanje utvrđena potreba za sudijom sa specifičnim radnim iskustvom.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 86 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 17 bodova od mogućih 20 bodova, što ga je u konačnici rangiralo na prvom mjestu rang liste kandidata sa ukupno ostvarenih 103 bodova od mogućih 120 bodova.

Kriteriji stručnosti i sposobnosti pravne analize imenovanog kandidata, koji već obavlja dužnost sudije, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 3 i 5, utvrđeno je da je kandidat za navedene tri godine za koje je ocijenjen ostvario prosjek od 4. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 4 dodijeljen je ekvivalentan broj bodova koji se koristi u konkursnoj proceduri od 86 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 17 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (1) tačka b) i 59b. st. (2) i (4) Poslovnika VSTV-a BiH stekao uslove za predlaganje i imenovanje na poziciju sudije kantonalnog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedenog kandidata ocijenilo da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine.

Nacionalna struktura 18 sudija, prema popisu stanovništva iz 1991. godine, bi trebala biti: Bošnjaci (12,9), Hrvati (0,6), Srbi (3,8), Ostali (0,7). Trenutna nacionalna struktura 13 sudija: Bošnjaci (12), Hrvati (1), Srbi (0), Ostali (0).

Prema prethodno navedenoj nacionalnoj strukturi u Kantonalnom sudu u Bihaću nedostaje kandidata iz reda bošnjačkog naroda (- 0,9), srpskog naroda (- 3,8) i ostalih (- 0,7), dok je kandidata iz reda hrvatskog naroda (+ 0,4).

Uzimajući u obzir trenutnu nacionalnu strukturu u navedenom sudu, Vijeće je za poziciju sudije imenovalo prvorangiranog kandidata, koji dolazi iz reda bošnjačkog naroda, a koji je ujedno jedini kandidat na rang listi.

Pored svega navedenog, a imajući u vidu potrebe navedenog suda za sudijom sa specifičnim radnim iskustvom, koja je utvrđena u skladu sa članom 34a. stavak (3) Poslovnika VSTV-a BiH, Vijeće je vodilo računa i o radnom iskustvu kandidata u određenoj oblasti prava, te je cijeniло da imenovani kandidat obavljajući dužnost sudije u Općinskom sudu u Bosanskoj Krupi posjeduje traženo iskustvo na građanskom referatu.

Cijeneći važnost ujednačenosti sudske prakse iz navedenih činjenica proizilazi da predloženi kandidat ima i zavidno iskustvo u poznavanju sudske prakse Kantonalnog suda u Bihaću, kao dugogodišnji sudija Općinskog suda u Bosanskoj Krupi.

Dakle, Vijeće je prilikom imenovanja navedenog kandidata, smatralo da se radi o kandidatu koji će uspješno, stručno i savjesno obavljati dužnost sudije kantonalnog suda, obzirom na njegovo dugogodišnje bogato i korisno iskustvo rada u pravosuđu, koje je sticao kao sudija općinskog/osnovnog nivoa.

Uzimajući u obzir sve navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i d) i stav (6) Poslovnika VSTV-a BiH, ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju sudije Kantonalnog suda u Bihaću.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-2194-/12025
Datum: 19.06.2025. godine


Predsjednik VSTV-a BiH
MP
Samir Bogunić, tužilac

